

Inuussutissarsiutigalugu aalisarnermi aammalu nunami tunisassiorneq pillugu tunisassiornikkut aningaasaqarnikkullu paasissutissanik nalunaarutiginnittarneq pillugu Namminersorlutik Oqartussat nalunaarutaat nr. 11, 1. august 2017-imeersaq.

Aalisarneq pillugu Inatsisartut Inatsisaanni nr. 18, 31. oktober 1996-imeersumi §§ 25 aamma 33 imm. 2, kingullermik Inatsisartut Inatsisaanni nr. 17, 3. december 2009-meersumi aamma nr. 28, 28. november 2016-imeersumi allanngortinneqartoq naapertorlugu, aalajangersarneqarpoq:

Atuuffia

§ 1. Kalaallit Nunaata aalisarnikkut imartami oqartussaaffigisaani inuussutissarsiutigalugu aalisarnermut nalunaarut atuuppoq, kiisalu taamatut oqartussaaffiup avataani Kalaallit Nunaanneersut 6 miiterinit anginerusumik aalisariuteqarlutik aalisartartunut atuulluni.

Imm. 2. Nalunaarutaaq nunami tunisassiorfinnut tunitsivinnullu aalisakkerinermut attuumassuteqartunut aamma atuutsinneqarpoq.

Imm. 3. Nalunaarut aalisartunut 6 meterisut angitigisumik minnermilluunniit aalisariutilinnut atuutsinneqanngilaq.

Paasissutissanik nalunaaruteqarnissamut piumasagaat

§ 2. Ingerlatseqatigiiffimmit § 1-imi ilaatinneqartumik ingerlatsisoq, ukiut tamaasa 1. juli nallertinnagu Aalisarnermut Naalackersuisoqarfimmut ukioq qaangiuttumi aalisariummi, tunisassiorfimmi imaluunniit tunitsivimmi pineqartumi tunisassiornikkut aningaasaqarnikkullu pissutsit pillugit paasissutissanik nalunaaruteqartassaaq.

Imm. 2. Paasissutissat imm. 1-mi nalunaarutigeqquneqartut nalunaarutigineqannginnerini kukkunersuiusumit nalunaarsorneqarnikumit akuersissutilimmilluunniit atsiorneqarsimassapput.

Imm. 3. Nalunaarusiornermi paasissutissat ilanngussami 1-imi, 2-mi 3-milu taaneqartut ilanngunneqassapput.

§ 3. Paasissutissat § 2-imiittut Aalisarnermut Naalackersuisoqarfimmut paasissutissanik immersuiffissat www.businessgreenland.gl-imiittut atorlugit elektroniskimik nassiunneqassapput.

§ 4. Tunisassiorfiit aamma tunitsiviit pisussaaffeqarput tulaassat pillugit § 1, imm. 1-imi taasatut suliffeqarfimmik ingerlatsisunut ukiumoortumik naatsorsuummik tunniussissallutik aamma tulaassisutut ingerlatsisimasuusunut, tamanna eqqortumik paasissutissanik nalunaarusiorluinnarsimasumik tunniussinissaq ilanngussaq 1 aamma 2-mi taaneqartuni qulakkeeqqullugu.

Imm. 2. Imm. 1-mi taasatut ukiumoortumik nalunaarut kaaviiartitat, ajunngitsorsiat (bonus) aamma suussusaanut aggulussimasunut aningaasarsiat allat pillugit paasissutissanik imaqassaaq.

Pineqaatissiinerit

§ 5. Piaaraluni mianersuaalliorujussuarluniluunniit §§ 2, 3 imaluunniit 4-imit unioqqutitsisoq Kalaallit Nunaanni Pinerluttulerinermik inatsimmi maleruagassat naapertorlugit akiliisitaanermik pineqaatissinneqarsinnaavoq.

Imm. 2. Inatsisitigut pisinnaatitaasutut pisussaataasutullu isigineqarsinnaasoq unioqqutitsisimappat, Kalaallit Nunaanni Pinerluttulerinermik inatsimmi maleruagassat naapertorlugit pinerluutinut akisussaatisisoqarsinnaavoq.

Imm. 3. Akiliisitsissutit imm. 1 aamma 2-mi aalajangersakkat malillugit pineqaatissiissutigineqarsimasut Nunatta Karsianut pisassanngortinneqassapput.


Atortuulersitsineq

§ 6. Nalunarut ulloq 2. august 2017 –i atuutsilersinneqarpoq.

Imm. 2. Peqatigitillugu Inuussutissarsiuutigalugu aalisarneq pillugu tunisassiornikkut aningaasaqarnikkullu paasissutissanik nalunaarutiginnittarneq pillugu Namminersorlutik Oqartussat nalunaarutaat nr. 11, 29. juni 2015-imeersoq atorunnaarsinneqarpoq.

Namminersorlutik Oqartussat, ulloq 1. august 2017


Karl Kristian Kruse


Jørgen Isak Olsen